

# Kursus Kenegaraan anjuran UMS, IKATAN semai budaya permuafakatan

4B 30.01.2012 46

Oleh YUSOP TEPPPO

armie\_bp@yahoo.co.uk

KOTA KINABALU: Para pelajar Pascasiswazah (Pengurusan Pendidikan) ambilan 2011/2012, Sekolah Pendidikan Pembangunan Sosial, Universiti Malaysia Sabah (UMS) dengan kerjasama Pertubuhan Pembina Generasi Sabah (IKATAN) telah mengadakan Kursus Kenegaraan - Program Transformasi Baktisiswa di Kem Bina Negara Kundasang, Ranau.

Kursus selama tiga hari bermula 29 hingga 31 Disember lepas itu diadakan dalam usaha menyempurnakan subjek Dinamika di bawah naungan Prof Madya Dr. Baharom Mohamad, melibatkan para pelajar pascasiswazah, Institut Pendidikan Guru (IPG) Tawau serta turut melibatkan peserta dari Sarawak dan Semenanjung Malaysia.

Objektif utama kursus ini diadakan adalah untuk membuat satu perkongsian di kalangan belia dan beliawanis serta penjawat awam agar menerapkan nilai-nilai murni di dalam diri setiap individu secara keseluruhan.

Program ini berjaya mencapai matlamatnya apabila tentatif program yang dirancang telah berjalan dengan lancar. Antara aktiviti yang dijalankan ketika program ini adalah seperti latihan dalam kumpulan, perbincangan mengenai kenegaraan, kawad kaki, kembara malam, serta ceramah dari pihak Biro Tata negara Negeri (BTN) sendiri.

Sementara itu, pengisian yang paling manis adalah apabila pihak penganjuran (pelajar Pascasiswazah UMS) mampu membawa Pengarah BTN iaitu Datuk Ibrahim Saad bagi mengisi slot Ceramah 1 dan juga sesi Tazkirah Maghrib pada 29 Disember 2011.

Pengisian yang dijalankan oleh IKATAN sesungguhnya sangat diperlukan untuk memangkin generasi berfikiran kelas pertama pada alaf ini.

IKATAN merupakan pertubuhan bukan kerajaan (NGO) yang ditubuhkan pada 12 Ogos 2011. Sungguhpun IKATAN merupakan satu pertubuhan NGO yang baharu tetapi pengalaman mereka dalam mengendalikan program



**BAHAROM diiringi Pengarah Program Transformasi Baktisiswa 2011 menyampaikan cenderahati kepada Ibrahim.**

dan aktiviti sedemikian tidak boleh dinafikan.

Sesungguhnya, kerjasama padu di antara BTN, IKATAN dan pelajar Pascasiswazah (Pengurusan Pendidikan) UMS boleh dijadikan satu titik tolak ke arah pelestarian pendidikan menerusi program-program seumpama ini.

Program seperti ini wajar dilaksanakan dalam usaha kerajaan untuk memupuk nilai-nilai murni di kalangan

rakyat Malaysia pada hari ini.

Penyemaian budaya permuafakatan dan silaturahmi di kalangan peserta jelas menunjukkan program 3 hari 2 malam ini sedikit sebanyak telah memberikan impak yang positif dalam diri mereka.

Perasmian penutupan disempurnakan oleh Pengerusi IKATAN, Norhasdi Hassan pada hari terakhir program ini berlangsung.

Usaha para pelajar Pascasiswazah (Pengurusan Pendidikan) 2011/2012 dengan kerjasama IKATAN mengadakan program seperti ini seharusnya terus dilaksanakan agar negara dapat melahirkan generasi yang beretika, berilmu serta mapan sekali gus membenarkan negara untuk bersaing dengan negara-negara gergasi dunia yang lain.



**BARISAN fasilitator dan peserta Kursus Kenegaraan - Program Transformasi Baktisiswa 2011.**